

«SUR la SELVA» il tierz album da Mattiu

Dapi entgin temps metta il cantatur Mattiu, alias *Mattiu Defuns* tut silla carta musica. Sco el di, hagi el saviu far in grond pass musical grazia al support da differents producents. Il giuven da 24 onns ha fatg da sia pissiun la professiun e venderdis proxim cumpara siu tierz album. «SUR la SELVA» ei il tetel da quell'ovra cun canzuns romontschas ruasseivlas, influenzadas da melanconia ed emeziuns. «Romontsch ei in lungatg zun melodius. Sch'jeu scrivel e contel romontsch ei quei il pli autentic e sincer», puntuescha Mattiu che viva a Laax. Las canzuns ein vegnidas registradas en ina tegia da mises a Milez, en in studio a Berlin ed ina ch'el conta ensemen cugl ensemble De Canto ella caplutta da *Peter Zumthor* a S. Benedetg. Mattiu e sia band selegran sin ina seria da concerts e secapescha era da seprestar questa stad silla tribuna gronda digl Open Air Lumnezia. (fmr/sr) **Pagina 3**

«La melanconia inspirescha mei»

«SUR la SELVA» ei il tetel dil niev mini-album (EP) da Mattiu che cumpara ils 27 da matg. Il giuven cantatur da Trun ei restaus fideivels a siu stil melanconic e sias canzuns ein spir emeziuns.

SUSI ROTHMUND/FMR

L'emprema vusch ch'ei d'udir ela canzun «Siemi» da Mattiu, alias *Mattiu Defuns* ei quella dall'aua, dalla neiv che liua a S. Benedetg sper la caplutta digl architect *Peter Zumthor*. La natira gioga numnadamein ina impurtanta rolla per il cantatur da Trun. Or ella natira vegn el savens inspiraues da scriver novas melodias e novs texts. «Per cumponer stoi jeu esser persuls, lu vegnel inspiraues d'ina seria d'accords e registreschel quei cul telefonin. Bia ei era da better, auter scrivel jeu si. Sias canzuns – ch'ei savens ualti melancolicas - scriva Mattiu numnadamein tuttas sez. «Hai giu in siemi, enzatgi tschintschava quiet. Seregordel mo pli vid sia vusch che raquintava – per mei tunav'ei sco in profet...», quei ei mo ina frasa ord la canzun «Siemi» che Mattiu ha registrau igl unviern ensemen cugl ensemble «De Canto» ella caplutta sur Sumvitg.

Tut sin ina carta

«SUR la SELVA» ei il tierz album dil musicist da 24 onns. Igl emprem «Undas» ha el ediu il 2016 ensemen cul rapunz *Giganto*. 2018 ei siu emprem solo-album «Da Funs» cumpariu ed il venderdis proxim cumpara il mini-album «SUR la SELVA». Mattiu ha frequentau la scola da talents a Glion e fatg in precuors d'art el Lichtenstein. Duront quei temps ha el gudiu lecziuns da cant e ghitarra, teoria da musica e ritmica e ha giu la pusseivladad da far musica ensemen cun conscolars. Aschia ha el entschiet a scriver atgnas canzuns, pil solit ed il pli bugen per romontsch: «Sch'jeu scrivel romontsch ei quei pli autentic ed ei va meglier da scriver enzatgei cun muntada profunda», di il cantatur che viva a Laax. Sias canzuns vegnan emessas da plirs emetturs da radio. Tuttina eis el cunscients ch'il success fuss forsa pli gronds sch'el cantass per engles ni tudestg e tuttina stat el fideivels al lungatg mumma e puntuescha:

«Romontsch ei in lungatg melodijs, biars pon sentir la musica e drovan buc dispet il text per capir las emoziuns. Ei dat gie era biars che teidlan cun plascher canzuns englesas e capeschan buc il lungatg.» Suentar haver luvrau enzacons onns sco pictur ed en auters jobs, metta igl um creativ dapi entgin temps tut silla carta musica. «Jeu vegnel buca rehs, mo sai viver dalla musica e hai aschia la peda da seconcentrar sin quei ch'ei mia pissiun.»

Emoziunal-melanconic

Las canzuns novas da Mattiu paran aunc pli ruasseivlas ch'usitau, ellas ein influenzadas da melanconia ed emoziuns ed ein era empauet pesontas. Gest quei ei la finamira dil cantatur che gioga bia cul lungatg da maletgs. Aschia datti era tier mintga canzun in video accumpignont ch'ei per exempel da veser sin Youtube. Leu vesan ins Mattiu ella natira, per exempel ella Val Frisal, a Vella ni era a Brün. «La melanconia schai a mi, melodias trestas ed era empau pesontas s'audan tier miu stil musical sferic ch'ei ina mischeida da pop ed indi», declara il giuven che sa senz'auter era rir da cor. Cun «sia» glied ch'el enconuschi bein vegni il temperament alla glisch ed el seigi plitost in viv. Ses sentiments sappi el denton exprimer il meglier culla musica, declara il giuven che descriva sesez sco tip da paucs plaid, in che teidla plitost tier ed ei magari empauet introvertaus. Mo co ei quei lu da dar concerts? Sepresentar e cantar ei negin problem, il mender ein per mei las pausas ch'ei d'emplenir cun raquintar enzatgei», di el e ri concedend: «Jeu sun empau in caot ed emblidel bia. Ina ga hai jeu perfin bunamein emblidau in concert e hai lu la davosa minuta aunc saviu spindrar la situaziun. Texts e melodias tegnel jeu perencunter endamen.»

Da Milez entochen Berlin

Las canzuns pil niev album ha Mattiu registrau en differents loghens, per exempel en ina tegia da mises a Milez ni era en in studio a Berlin. Support survegn el dils producents *Gianluca Giger*, *Dabu Bucher* da Dabu Fantastic e Schumann&Bach da Berlin. «Grazia a quei sustegn e lur cussegls hai jeu saviu far in grond pass musical», di Mattiu. Per las registraziuns ha Gianluca Giger sunau il bass. El suna era tier diversas bands sco Dabu Fantastic, Breitbild ni Fromkid. Questa stad ed igl atun vegnan Mattiu e sia live-band a sepresentar a caschun da numerus concerts. «Nus selegrein d'astgar dar ina massa concerts, oravontut era d'astgar sepresentar questa stad gia per la tiarza ga agl Open Air Lumnezia. Quella ga silla tribuna gronda.» Dalla band-live fan part *Nina* e *Tiziana Defuns*, las soras da Mattiu e lur zavrin *Andriu Defuns* suna il keyboard. *Marco Grischott* suna gitarra, *Jérôme Keel* la batteria e *Vito Cadonau* il bass.

* www.mattiu.ch